

尻大熱、腰腹痛、背如弓、舌胎黑者爲腎經。此內症之五經也。雖然五經之辨如此，而其吉凶豈可執以論哉？所重在於氣血毒之多少，以爲定準。次以五經之徵驗，參看施治則可矣。

解毒化毒論

解者，毒從氣分而解；化者，毒從血分而化。何謂毒從氣分而解？痘毒蘊於腎臟，感天之時氣而後發。未感之時，痘毒與血氣渾成一塊，未嘗破解。有感之後，痘毒與血氣漸漸分離，如胎之將產，正子母分形解體。

時也。痘出一分，毒解一分；痘出二分，毒解二分；痘盡出而能長，則五臟無留邪，其內毒盡解，特在肌膚之間而未化耳。然成形成膿而有色者，雖曰是血而使之能出透，能起發者，則氣之領逐其血，開竅衝利而爲之運行也。凡此毒從氣分而解之，順痘也；等而下之，有出不透，出不快，而不起脹者，須用藥以助其勢，迎其機，開竅理氣，竭力疏通，使之出透起脹，則亦痘出一分，毒解一分；痘出二分，毒解二分；痘盡出，毒盡解矣。解乃分解之解，如人之相鬪，衆聚一塊，而我爲

之分解也。若時氣盛，則清解時氣；胎毒盛，則解胎毒。或解表，或解裏，或表裏雙解，或用涼藥以殺其毒，或用下藥以瀉其毒。若畏而不解，胎毒與時氣合熾，爲害大矣。故痘兼雜症爲害者，急須解散也。何謂毒從血分而化？膿者血之變也。必穢稠而滿，色白根紅，不寒不熱，痘毒之在肌膚者，盡附於瘡窠，而內無留邪，將毒化而爲痂矣。或肉腫而痘枯，或空殼而無膿，或漿清而不滿，或有膿而根窠不紅，種種之症，皆血病而毒不化也。治之必兼調氣。如血虛，補血必補其氣。

陽盛而陰長、血滯、活血必理其氣、氣行血亦行、然必
血不病而毒自化、化乃腐化之化、渾化之化、如草腐
爛而成土、柴火化而成灰、痘從出透起脹成膿而毒
化、所剩者痂而已矣、解化之別如此

順逆

方書所云順逆、此其大概、非順陰逆三等之謂也、如
痘瘡喜溫煖生長、故曰春夏爲順、畏寒冷收藏、故曰
秋冬爲逆、此時之順逆也、大小便閉而能食者爲實
爲順、大小便洩而不能食者爲虛爲逆、此虛實之順

逆也。痘瘡出者爲順，倒靨陷伏者爲逆。此出入之順逆也。前疹後痘者，外邪已發爲順；前痘後疹者，氣虛復感爲逆。此前後之順逆也。上多下少者爲順，陽氣上升，下多上少者爲逆，真氣下陷。此上下之順逆也。凡此約論其概，若拘於前者爲順，究竟逆而死；前者爲逆，究竟順而生，不可以此論痘也。

攻補

攻補所關大矣。攻者，汗吐下及涼解之劑是也；補者，補表補裏及溫飲之劑是也。如發熱見點，頭痛身熱，

面赤無汗、左手脉大於右、此外感風寒、速宜汗之、如
麻黃升麻之類也、不汗則寒邪閉固而爲害、如發熱
見點、胸滿氣促、痰壅多驚、上部脉大於下部、此痰食
諸症、壅遏於上、速宜吐之、如馬薹漏蘆之類也、不吐
則神思昏悶而爲害、如發熱見點、胸滿腹飽、大便不
瀉、右手脉大於左、此火毒與食積相併、速宜下之、如
大黃朴硝牽牛之類也、不下則食毒脹悶而爲害、如
發熱見點、但大渴大熱、汗自出、大便通、速宜涼之、如
犀角黃連之類也、若諸症不重、總以輕揚之劑和解

升發不必過於攻也。大約攻者，用於七日以前。如作
漿收靨，寒戰咬牙多汗不眠，下利不食，四肢厥冷，痘
無光澤，此表裏虛也。總宜補，補則人參黃耆之類。若
偏於表，偏於裏，宜隨症用補藥。如補而不效，虛寒之
症，內外無疑，速宜溫熱，如附桂丁香鹿茸之類也。若
虛症不現，總以調和脾胃，不必過於補也。大約補者
用於七日以後。然痘有初起虛寒，或久病而發，厥冷
無神，見點無色，便用參附以扶正氣，使毒得出於
外。此以補爲攻之用也。有漿靨回脫之時，或冒寒暑，

或傷驚食此爲急則治表仍用麻黃大黃黃連以劫其邪然後隨補此以攻爲補之用也至於邪氣未盡正氣未衰早用補劑輕則餘熱壅毒重則卒變而死邪氣已盡正氣已衰虛寒極矣尙用攻劑輕則驚恐不寧重則虛脫而死此皆不審表裏虛實之悞也攻補所關大矣哉

痘不爲害惟毒爲害論

痘不爲害惟毒爲害何說也蓋毒盡附於痘之顆粒則不爲害不歸顆粒則爲害也如痘之初出尖圓其

色微紅、與無痘處皮色迥異、挨次出齊、是毒盡歸於
顆粒、何害之有、倘痘不尖圓、其痘色與皮色渾無界
限、或出不快、出不齊、是毒不盡歸於顆粒、邪留五臟、
將變端百出、此時當合色脉、隨其所因而治、必使盡
歸於顆粒而後已也、無論隨所因而用何劑、劑中必
加透竅以逐其毒、如痘之起脹行漿時、漸漸放白、血
色附於根腳、周圍環抱而無外布之勢、是毒盡歸於
顆粒、何害之有、倘頂不放白、根腳血色散漫、痘色與
皮色渾無界限、或爲倒陷、或爲倒靨、是毒不盡歸於

顆粒邪留肌肉將變端百出此時當合色脉隨其所
因而治必使其毒盡歸於顆粒而後已也無論隨所
因而用何劑劑中必加歛血以歸其毒治法得宜則
毒隨痘盡痘回而毒消若痘去毒存終爲可慮

痘不以稀密分輕重說

俗調痘稀則輕密則重此論其常未可以語變也
有雖稀亦重者如毒重表實氣血凝滯但踈踈顆粒見
於皮膚之外大毒窩伏於內至起脹之時忽然低陷
忽變紫黑喘悶而死此假稀也宜速治之但看其痘

無根脚無色澤手足如冰六脉細數嘔逆煩躁口臭
舌焦犯此一端卽宜預防有密亦可救者毒盛而痘
密其毒已盡出於皮膚之外只看其形色紅活滋潤
不焦不陷調養得度用藥得正自可生也但能飲食
二便如常神情脉息不改所謂形病而氣不病也至
於密如蠶子色闇頂陷形如蛇殼色白囊空蚊跡蚤
斑其色現於皮膚之上其形終未起發前症雖平不
能救也有痘在肌膚之內氣血虛弱無力送出外見
幾點冷汗無神倦怠不眠若不竭力扶出必至綿延

多日而不可救、又有將發熱、痘出一二粒、或四五粒、兩三日後、忽然高起、根腳開濶、暈紅帶紫、五六日後、似膿非膿、似靨非靨、宜早挑破、敷藥、投以攻解之品、週身得出正痘、庶可回生、倘過七八朝、則喘急而斃、此爲假稀、其害匪小、若真稀、則不在此論矣。

雜症相兼說

治痘者、不知雜症相兼、不可以爲治也、有預感宿疾、如瘡痢驚疳、消燦真元已久、而忽出痘者、藥不可過攻、以固本爲主、有驟感時疾、雜症閉塞、而忽出痘者、

須速去雜症以攻削爲主此痘皆因雜症而生當於雜症中尋治痘法有已出而感雜症者有痘後而得雜症者是雜症因痘症而生當於痘症中尋治雜症法此一定之理也

內外合參

痘有十順一險者死十險一順者生有順險相同而一生一死者將何以別之曰合內外可也何謂內神情脉息聲音好惡飲食二便是也何謂外形色部位稀密漿瓣五官四體是也所謂十順一險者如稀疎

磊落起發盛漿外症順矣飲食二便如常內症順矣
內外症皆順而有或犯一險者不治如不時乾噦乾
噦者大毒伏於胃也如舌上乾胎舌乃心之苗也心
危則十二官危矣如大腸乾結或下腸垢乾結火毒
鬱也腸垢真氣脫也如六脉細數細數者陽極陰涸
也諸如此類皆內症之一險也如天門一二顆獨大
頂陷中焦心家毒未泄也如臍中獨出四五顆腎家
毒未泄也如胸骨忽高肺毒盛也如足心冷如冰火
毒上炎也如顙頂氣出如烟真元上泄也諸如此類

皆外症之一險也。諸順症之中，犯此一險者，須防其立變。此痘最順而藏險於不易察者，所謂十順一險者也。如痘密細小，起發遲，盛漿淡，或發痒，或寒戰咬牙，或譫語撮空，外症險矣。聲低作噎，或便結，或泄痢，內症險矣。內外症皆險，而或得一順者可治。如飲食如常，脾胃無傷也。如睡臥自如，內毒本輕也。如言語自如，真氣足也。如舌心紅潤，心無病也。如神情好惡不改，平日火毒盡也。諸如此類，皆內症之一順也。如天門尖綻，心火泄也。如身半以上，忽發痘毒，隨出膿

水毒氣聚於此也。如身半以下亦有微漿。周身俱有
瓣也。如眼內出膿。漿毒從此而解也。如仰側自如。身
輕毒亦輕也。諸如此類。皆外症之一順也。諸險症之
中。見此一順者。可保其得生。此痘最險。而藏順於不
易察者。所謂十險一順者也。至有同此順險而生死
不同者。或症有真假。治有遲速。時有寒暑。必稍有不
同也。不可以不察。

脉辨

從來醫者。未有不言脉。言脉未有不本王叔和脉經

者後爲庸流僞編歌訣所以昔賢辨論並起意見各出如褚澄有倒裝五臟之說王正宗以心肺俱浮肝腎俱沉脾主中州之說趙繼宗亦附云左尺爲肝右尺爲腎吳草廬以十二經兩手寸關尺皆手太陰肺經之一脉分部位以候地臟之氣後如戴起宗李如珍又各爲脉訣諸說紛紛若無宗主然終古不可易者惟脉經耳幼科脉論向來不詳至於痘疹以爲有形之證無所用診甚有以診脉爲欺人者獨不思治痘者治氣血也虛實也寒熱也表裏也而脉之所候